



Broj/Број: 01/7-50-1-53-2-16/04
Sarajevo/Сарајево: 08.06.2004.

ZAPISNIK

sa 16-e sjednice Administrativne komisije Zastupničkog doma Parlamentarne skupštine Bosne i Hercegovine, održane u prostorijama institucija Bosne i Hercegovine dana 08.06.2004 godine sa početkom u 13,15 sati. Sjednica je završena u 14,30 sati.

SJEDNICI SU BILI NAZOČNI ČLANOVI KOMISIJE: Jusufović Munib, Zorić Vinko, Kragulj Nikola, Ušanović Mubera, Križanović Jozo, Ivo Miro Jović, Felić Hazim;

OPRAVDANO NENAZOČNI ČLANOVI: Blagojević Mirko, Novaković Momčilo;

OSTALI NAZOČNI: Vedran Hadžović Tajnik Zajedničke službe Tajništva Parlamentarne skupštine Bosne i Hercegovine; dr Zlatko Lagumdžija, predlagač Rezolucije po točki AD-2 dnevnog reda;

Šesnaestom sjednicom, Administrativne komisije Zastupničkog doma Parlamentarne skupštine Bosne i Hercegovine, **predsjedavao je Munib Jusufović predsjedatelj** Administrativne komisije Zastupničkog doma Parlamentarne skupštine Bosne i Hercegovine.

Za sjednicu je predložen slijedeći:

DNEVNI RED:

1. Usvajanje Zapisnika sa 15-e sjednice Administrativne komisije;
2. Razmatranje "Rezolucije o povlačenju iz procedure i uvođenju privremenog petogodišnjeg moratorijuma na sve zakone i odluke kojima se uvode nove privilegije izabranih dužnosnika u izvršnoj i zakonodavnoj vlasti" dr Zlatka Lagumdžije, po zaključku sa 15-e sjednice Administrativne komisije ;
3. Razmatranje Zahtjeva predsjedavajućih Klubova zastupnika za iznalaženje prostora za rad Klubova i to:
 1. -Mješovitog kluba zastupnika;
 2. -HDZ-Demokršćani;
 3. -Srpske demokratske stranke;
4. Razmatranje Zahtjeva za odobrenje naknade za odvojeni život i smještaj zastupnika Mubere Ušanović;

Pošto je predsjedatelj otvorio 16-u sjednicu Administrativne komisije upoznao je prisutne sa predloženim dnevnim redom i pozvao ih ukoliko imaju dopuna dnevnog reda da iste predlože. Tajnik Zajedničke službe Tajništva Parlamentarne skupštine Bosne i Hercegovine Vedran Hadžović je predložio da se u dnevni red uvrsti točka **AD-5 Razno** u okviru koje bi se razmotrila određena aktuelna pitanja.

Po završenoj raspravi o predloženom dnevnom redu za 16-u sjednicu Administrativne komisije, predsjedatelj Munib Jusufović je dao na glasovanje utvrđeni dnevni red sa predloženom točkom AD-5 Razno. **Dnevni red sa predloženom izmjenom usvojen je jednoglasno.** Pošto je usvojen dnevni red, pristupilo se razmatranju istog, po pojedinim točkama.

AD-1 Zapisnik sa 15-e sjednice Administrativne komisije, usvijen je jednoglasno bez primjedbi.

AD-2 Uvodno izlaganje po ovoj točki dnevnog reda dao je Vinko Zorić predloživši da se Rezolucija povuče, budući da je njegovo mišljenje da ista nije aktuelna u vremenu. Nakon uvodnog izlaganja imenovanog, predsjedatelj Munib Jusufović je, obzirom da predlagač još nije bio došao na sjednicu iako je uredno pozvan, **dao dva prijedloga i to: da se Rezolucija razmatra bez prisustva predlagača ili da se odgodi rasprava po Rezoluciji za narednu sjednicu Administrativne komisije.**

Za riječ se zatim javio Jozo Križanović i istaknuo, da je sadašnja formulacija Rezolucije sukladna onom što je usaglašeno sa predlagačem na 15-oj sjednici Administrativne komisije, pa nevidi razloga da se ista ne razmatra na današnjoj sjednici. **Posebno je istaknuo, da je smisao Rezolucije da se uputi poruka svim korisnicima budžetskih sredstava uključujući i javne fondove, tako da bi bilo dobro da Zastupnički dom prihvati jednu ovakvu Rezoluciju.**

Nakon ove diskusije, predsjedatelj Munib Jusufović je istaknuo, da se slaže sa ciljem i duhom Rezolucije i naglasio da u Rezoluciji točke 2, 3, 4 i 5 nisu sporne, ali je sporna točka 1. Postavio je pitanje članovima Administrativne komisije, da li ima Administrativna komisija nadležnost, obzirom da je Administrativna komisija ušla u proceduru po pitanju Zakona o pravima i dužnostima članova Parlamentarne skupštine Bosne i Hercegovine i da se po tom pitanju stalo kod Doma naroda Parlamentarne skupštine Bosne i Hercegovine, da sad ulazi u nadležnost Zastupničkog doma Parlamentarne skupštine Bosne i Hercegovine? **Istakao je, da je Administrativna komisija kao nadležna po ovom pitanju, citirani Zakon dala u proceduru i sa istom se stalo, s tim da je Dom naroda u tom pogledu otišao s procedurom dalje od Administrativne komisije. S ovim se otvara pitanje, da li to znači da se oduzima pravo nadležnim komisijama da rade svoj posao i da li će se raspravljati pet sati o tome da li naprijed navedenom odgovara rečenica “ovaj moratorij....” ?**

Pošto su otvorena pitanja po spornoj točki 1 Rezolucije, za riječ se ponovo javio Vinko Zorić, postavivši pitanje kome je to loša socijalna situacija i da li će se ista popraviti ukoliko se smanje plaće zastupnicima ?

Replicirao mu je Jozo Križanović, istaknuvši da se socijalna situacija hoće popraviti ukoliko se nebudu uvodile nove privilegije. Vratio se tekstu Rezolucije skrenuvši pažnju da, **to upravo naglašava Rezolucija u točki 1 kojom se uvodi moratorij na uvođenje novih privilegija i na taj način upravo sprečava da se iste uvedu.**

Na ovo izlaganje je replicirao Munib Jusufović stavljajući ponovo naglasak na ulogu Komisija. **Postavio je pitanje, da li se točkom 1 ograničava pravo Komisija i da li to znači da Komisije ne mogu koristiti svoje zakonsko pravo ? Da li to ujedno znači, da treba da Komisije ukinu svoje odluke, pa je s toga veoma ozbiljna točka 1. Nadalje je istaknuo, da ukoliko se ostaje pri tome da ostaje točka 1 Rezolucije, on si zadržava pravo da na istu izuzme svoje mišljenje.**

Posebno se u svojoj diskusiji osvrnuo na ulogu Doma naroda, pitajući se, da li će isti prihvatiti točku 1 Rezolucije.

Za riječ se ponovo javio Jozo Križanović. Podsjetio je članove Administrativne komisije da je Kolegij ovlastio Administrativnu komisiju da pripremi citirani Zakon. Identično tome članovi Administrativne komisije pripremaju Rezoluciju za Zastupnički dom Parlamentarne skupštine Bosne i Hercegovine.

Po ovoj diskusiji, riječ je tražio Vinko Zorić i naglasio, da se na 15-oj sjednici Administrativne komisije nije preciziralo šta u smislu ove Rezolucije znači "nove privilegije"?

Učešće u diskusiji, po pitanju značenja točke 1 Rezolucije, zatim je uzeo Nikola Kragulj. Podsjetio je prisutne da se na 15-oj sjednici Administrativne komisije po ovoj točki dnevnog reda raspravljalo sat vremena i da je Rezolucija napisana upravo onako kako su se usaglasili na 15-oj sjednici Administrativne komisije. Sukladno naprijed navedenom točka 1 je u načelu tako dogovorena, pri tome istaknuvši, da članovi Administrativne komisije nisu bili informirani o proceduri citiranog Zakona. Naglasio je, da se pri utvrđivanju teksta Rezolucije smatralo, u Administrativnoj komisiji, da je Zakon umiren, te da se isti može povući, a da se u isto vrijeme može ići u proceduru sa novim Zakonom shodno ovoj točki s tim, da se ne uvode nove privilegije. U cijeloj stvari se željela poslati jedna poruka prema Zastupničkom domu da se ni u jednoj budžetskoj instituciji ne povećavaju osobna primanja.

Nakon ovog izlaganja Munib Jusufović je ponovo podsjetio prisutne članove, da je Dom naroda u proceduri oko citiranog Zakona otišao mnogo dalje. Istakao je, da se u Zastupničkom domu navedeni Zakon zaustavio pri Ustavno-pravnoj komisiji, a da je Dom naroda u proceduralnom smislu otišao još dalje. Ponovo je podvukao da nisu sporne točke 2, 3, 4 i 5 Rezolucije već je sporna točka 1 u oba segmenta i to iz naprijed navedenih razloga i pitanja sukoba nadležnosti. Sporan je također i drugi dio točke 1 gdje stoji da će Parlamentarna skupština Bosne i Hercegovine morati donijeti odluku o ukidanju moratorijuma.

U toku naprijed navedene rasprave na sjednicu je došao predlagač Rezolucije poslanik dr Zlatko Lagumdžija. Predsjedatelj Munib Jusufović je upoznao predlagača Rezolucije sa dosadašnjim tokom rasprave. Naglasio je, da postoje po ovom pitanju slijedeća rješenja i to: da se Rezolucija prihvati u cijelosti, da se Rezolucija prihvati u dijelu koji nije sporan, a to su točke 2, 3, 4 i 5 i da se Rezolucija odbaci kao neprihvatljiva. Jusuf Munibović je naglasio, da je između ostalog sporan i sam naziv Rezolucije.

Po ovom uvodnom informisanju o toku dosadašnje rasprave, predlagač Rezolucije dr Zlatko Lagumdžija je istaknuo, da je došao da kaže Administrativnoj komisiji da je napisao ono što se usvojilo na 15-oj sjednici Administrativne komisije. Ujedno je postavio pitanje, da li postoji saglasnost u Administrativnoj komisiji da je tekst Rezolucije ono što se dogovorilo na citiranoj sjednici? Istakao je, da je on usaglašen tekst samo stavio u formu, pa sad želi postaviti pitanje kako se misli izaći iz novonastale situacije u proceduralnom smislu?

Nakon izlaganja predlagača Rezolucije za riječ se javio Vinko Zorić. Ponovo je u svojoj diskusiji istaknuo pitanje, o kakvim se lošim socijalnim-ekonomskim uvjetima u Rezoluciji govori, posebno naglasivši, da se na 15-oj sjednici raspravljalo o moratorijumu po pitanju njegovog trajanja tj. neograničeno moratorij ili da se isti prekine nekom odlukom kao što je na 15-oj sjednici objasnio predlagač dr Zlatko Lagumdžija.

Na ovu diskusiju Munib Jusufović je predložio, da se u prvoj točki Rezolucije kaže, da se moratorij odnosi na osobna primanja, budući da se tekstom točke 1 Rezolucije oduzima legitimno pravo zastupnika da predlaže zakone. Ponovo je naglasio, da je njegov stav da se zamrznu plaće obzirom na ekonomsko-socijalnu situaciju.

Predlagač Rezolucije dr Zlatko Lagumdžija je pojasnio namjeru točke 1 Rezolucije, u smislu, da se citirani Zakon u točki 1 povlači, ali da to ne znači da se ne može donijeti novi!

Munib Jusufović je ponovo naglasio, da po njemu nisu sporne točke 2, 3, 4 i 5 već je za njega sporna cijela točka 1.

Za riječ se javio Felić Hazim sugerirajući da se točka 1 promatra sa stanovišta, šta ona znači za Dom naroda. U tom smislu je i postavio pitanje, može li se voditi rasprava u smjeru da se prva točka usaglasi na zajedničkoj komisiji oba Doma ?

Dr Zlatko Lagumdžija je naglasio, **da se i ovakav prijedlog može prihvatiti, ukoliko će to doprinjeti da se ova točka riješi!**

Ponovo je uzeo riječ Munib Jusufović i **predložio, da se prihvate četiri točke Rezolucije koje nisu sporne.**

Ovaj prijedlog je podržao Vinko Zorić naglašavajući, **da točka 2 u stvari obavezuje sve komisije po pitanjima navedenim u točki 1.** S ovom konstatacijom složio se i Munib Jusufović.

Na naprijed navedenu diskusiju javio se dr Zlatko Lagumdžija sa prijedlogom, da se u točki 1 Rezolucije **briše tekst "povlači iz Parlamentarne procedure Zakon o pravima i dužnostima članova Parlamentarne skupštine i "**

Nakon ovog prijedloga Munib Jusufović je predložio, **da se prva točka izbac, a da točka 2 bude točka 1 Rezolucije.**

Vinko Zorić je u naprijed navedenom kontekstu naglasio, **da Parlamentarna skupština Bosne i Hercegovine ne može biti talac jedne Rezolucije.** Istakao je, **da su poslanici dužni voditi računa o svim aktuelnim pitanjima i sukladno sa tim donositi zakone.**

Dr Zlatko Lagumdžija je potvrdio izneseno mišljenje, naglasivši, **da se ipak netrebaju uvoditi nove privilegije.**

Felić Hazim je predložio, **da se u tom slučaju naglasi, da se uvodi moratorij na sve zakone koji uvode nove privilegije.**

Munib Jusufović je ponovo istaknuo prijedlog, da se usvoje točke 2, 3, 4 i 5, te da se vidi treba li usaglašavati sa Domom naroda točku 1 ? Naglasio je ponovo, da je sporan i sam naziv Rezolucije, kao i prijedlog dr Lagumdžije **da se briše tekst " povlači iz....itd."** po pitanju, **šta se uradilo tim potezom, te tražio objašnjenje, kako će se i u kojoj formi pojaviti inicijativa od zastupnika, ako ostane riječ moratorij ?** Smatra da predlagač dobro zna, šta čini ovim potezom u točki 1.

Vinko Zorić je nakon ovog izlaganja istaknuo, da je on protiv Rezolucije. Smatra, da se Administrativnoj komisiji oduzimaju prava utvrđena člankom 42 stavak 1 točka (a) Poslovnika Zastupničkog doma Parlamentarne skupštine Bosne i Hercegovine ("Sl.glasnik BiH" br.: 20/00), a **to znači da, Administrativna komisija neće raditi dok Parlament ne donese odluku.** Istakao je, **da se želi Rezolucijom regulisati ono, što se reguliše zakonom.** Predlaže, da se u točku 1 unese, da će Administrativna komisija biti ta, koja će dati razlog, da se donese odluka kojom se prekida moratorij.

Nakon ovog prijedloga, za riječ se javio Ivo Miro Jović i predložio **da se točka 1 Rezolucije modificira na način, da bude uvođenje maratorijuma na sva dalja povećanja na osobna primanja izabranih dužnosnika u izvršnoj i zakonodavnoj vlasti.**

Predlagač Rezolucije dr Zlatko Lagumdžija je prihvatio navedeni prijedlog da se u tekst točke 1 iza teksta **"uvodi moratorij na sve zakone i odluke kojima se uvode"** unese tekst **" povećanja osobnih primanja,"** a da se tekst **"nove privilegije"** briše. Dr Zlatko Lagumdžija je također predložio, da se iz naslova Rezolucije briše tekst **"povlačenju iz procedure"** a da se usvoji prijedlog, da se umjesto teksta **"nove privilegije"** unese tekst **"povećanja osobnih primanja."**

Ivo Miro Jović je, u smislu svoje naprijed navedene diskusije istaknuo, da Rezolucija nije odbačena, a važno je, **da se nešto za ljude odradilo i time se odaslala jedna pozitivna poruka.** Smatra da se predloženim kompromisom izašlo u susret i komisijama budući da, ova Rezolucija ima smisla.

Opet se javio predlagač Rezolucije pitanjem, šta navedeni prijedlog znači sa stanovišta cigtiranog Zakona?

Ivo Miro Jović je odgovorio, da to znači, da se ostavi Zakon koji reguliše ovu problematiku.

Munib Jusufović je dopunio pojašnjenje u tom smislu, da to znači, da će se pojaviti više verzija o kojim će se moći raspravljati.

Dr Zlatko Lagumdžija kao predlagač Rezolucije je zatim istaknuo, da po datim sugestijama u točki 1 iza teksta Zastupnički dom, dakle, treba brisati tekst “**povlači iz.....i**”, pa ide tekst “**uvodi moratorij na sve zakone i odluke kojima se uvode**” pa se briše tekst “**novе privilegije**”, a umjesto njega unosi tekst “**povećanja osobnih primanja.**”

Zatim je Ivo Miro Jović predložio dalji tekst točke 1 “**Ovaj moratorij traje dok se odlukom nadležnih tijela ne konstatuje, da su se poboljšale ekonomske i socijalne prilike zbog kojih je donesena ova Rezolucija**”.

Nakon ovog prijedloga druge rečenice teksta točke 1 Rezolucije, isti je pročitao prisutnim članovima Administrativne komisije Munib Jusufović.

Dr Zlatko Lagumdžija je također pročitao tekst, te predložio da ga pročita i predsjedatelj Administrativne komisije.

Pošto su usaglašeni i usvojeni prijedlozi za izmjene i dopune Rezolucije, na Administrativnoj komisiji je pročitan tekst naziva Rezolucije i točke 1, tako da usaglašen tekst Rezolucije na 15 i 16-oj sjednici predlagača dr Zlatka Lagumdžije glasi:

REZOLUCIJA

o uvođenju moratorijuma na sve zakone i odluke kojima se uvode povećanja osobnih primanja izabраних dužnosnika u izvršnoj i zakonodavnoj vlasti

1. Zastupnički dom uvodi moratorij na sve zakone i odluke kojima se uvode povećanja osobnih primanja izabраних dužnosnika u izvršnoj i zakonodavnoj vlasti. Ovaj moratorij traje dok se odlukom nadležnih tijela ne konstatira da su se poboljšale ekonomske i socijalne prilike zbog kojih je donesena ova rezolucija.
2. Pozivaju se sve institucije BiH, kao i nadležne komisije i tijela tih institucija da preispitaju svoje odluke donesene u protekloj godini o povećanju osobnih primanja sukladno ovoj rezoluciji i na bazi analize koju će sačiniti Vijeće ministara o ekonomskom i socijalnom stanju u zemlji.
3. Vijeće ministara će o realizaciji ove rezolucije izvještavati Parlamentarnu skupštinu u zadnjem tromjesečju svake godine kako bi se moglo vršiti usklađivanje osobnih primanja izabраних dužnosnika u državnim institucijama i javnim poduzećima isključivo sukladno rastu GDP i ukupnoj ekonomskoj i socijalnoj situaciji u zemlji sukladno strategiji PRSP.
4. Poziva se Vijeće ministara da cjelovito i sukladno zaključku doma donesenom pri usvajanju budžeta za 2004. godinu i sukladno ovoj rezoluciji zakonski uredi prava i dužnosti svih budžetskih korisnika.
5. Zastupnički dom upućuje poziv institucijama na svim nivoima kao i javnim poduzećima, da daju doprinos stabilizaciji ekonomskih kretanja primjenom ovdje iznesenih principa u svojim sredinama.

Pošto je pročitan usaglašen tekst Rezolucije, prije nego je ista data na glasovanje, predsjedatelj sjednicom Administrativne komisije je naglasio, **da se u dobronamjernom duhu kao**

znak dobre volje može posmatrati ova Rezolucija jer se šalje poruka, da se zamrzavaju povećanja osobnih primanja izabranih dužnosnika dok traju nepovoljne ekonomsko-socijalne prilike.

Nakon ovog izlaganja, usaglašeni tekst prijedloga Rezolucije je dat na glasovanje. Prisutni članovi Administrativne komisije su, sa **6 glasova za i 1 protiv**, usvojili prijedlog Rezolucije u naprijed navedenom tekstu.

AD-3 Po ovoj točki dnevnog reda je naglašeno, da je ista **vezana uz točku AD-5 Razno**. Predsjedatelj Munib Jusufović je naglasio, da na temelju dostavljenog snimka raspoloživog prostora izgleda da nema, trenutačno vidljivog rješenja.

Nakon ove konstatacije, za riječ se javio Zorić Vinko i istaknuo, da on već drugi put podnosi zahtijev za dodjelu prostora za rad Kluba. Smatra, da je potcjenjivački pričati da nema prostora, te da je **Snimak prostora** dostavljen od stručnih službi **netočan**. Istakao je, da je vidio vrata na kojim piše Klub SDP. Ističe, da je neko ispred stručnih službi napisao da je Klub HDZ-a u predsoblju, pa iz tog jasno proizilazi, da Klub HDZ-Demokršćani nema nikakvu prostoriju za razliku od Kluba SDS-a.

Nakon obrazlaganja zahtjeva predsjedavajućeg Kluba HDZ-Demokršćani, Munib Jusufović je uputio pitanje Tajniku Zajedničke službe Parlamentarne skupštine Bosne i Hercegovine, **da li Klub SDS-a ima ikakvu prostoriju za rad Kluba ?**

Tajnik Zajedničke službe, Parlamentarne skupštine Bosne i Hercegovine, Hadžović Vedran je obrazložio trenutno stanje sa prostorom, te istaknuo da Klub SDS-a trenutno koristi prostor u kojem sjedi Milan Zjajić.

Potom se za riječ javio Jozo Križanović i pitao, **piše li i gdje piše SDP ?**

Na to je replicirao Zorić Vinko istaknuvši, **da svoju prostoriju nema jedan predsjedatelj komisije kao npr. gosp. Martin Raguž, dok neki predsjedatelji komisija imaju svoje prostorije!**

Nakon ovog iznesenog podatka, predsjedatelj Munib Jusufović je zatražio od Hadžović Vedrana, **da objasni, koji predsjedatelji komisija imaju svoje prostorije.**

Hadžović Vedran je odgovorio, da svoje prostorije imaju svi predsjedatelji.

Na ovaj podatak, replicirao je Munib Jusufović istaknuvši, **da on kao predsjedatelj Administrativne komisije nema svoje prostorije.**

Zorić Vinko je ponovo naglasio, da će on opet podnijeti zahtjev ispred Kluba HDZ-Demokršćani, budući da Snimak prostora koji je dostavljen Administrativnoj komisiji nije tačan.

Munib Jusufović je nakon ove diskusije **konstatirao, da Klub HDZ-Demokršćani nema nikakav prostor.**

Nakon ove konstatacije Zorić Vinko je istaknuo, da **obzirom na ovakvo stanje sa prostorom, Klub ne drži sjednice nigdje**. Ukazao je i na stanje izazvano odlukama Visokog predstavnika, kad se radi o financiranju rada Klubova ističući, da je **Visoki predstavnik** Nalogom kojim se obustavljaju sve isplate sa utvrđenih budžetskih pozicija za stranačko financiranje HDZ-a; ("Sl.glasnik BiH" br.: 12/04) i Odlukom kojom se obustavljaju sve isplate sa utvrđenih proračunskih pozicija za stranačko financiranje SDS-u i kojom se izdaje nalog SDS-u za podnošenje financijskog plana za period od 01. siječnja 2003 do 31. ožujka 2004 godine; ("Sl.glasnik BiH" br.: 14/04) **obustavio novac za stranke, a ne novac za rad Klubova.**

Ivo Miro Jović je također iznjeo svoje mišljenje po pitanju odluka Visokog predstavnika **istaknuvši, da se iste ne odnose na rad Klubova.**

Vezano za ovo pitanje, koje se pojavilo u vezi sa ovom točkom dnevnog reda i mišljenje svih prisutnih na sjednici, da bi bilo logično da se citirane odluke Visokog predstavnika ne odnose na sredstva namijenjena za rad Klubova, budući da je njihova djelatnost usko vezana sa radom Parlamentarne skupštine Bosne i Hercegovine, a što je i utvrđeno Poslovníkom Zastupničkog doma Parlamentarne skupštine Bosne i Hercegovine ("Sl.glasnik BiH" br.: 20/00), predsjedatelj Munib Jusufović je predložio da bi u tom smislu se trebalo dati ispred Administrativne komisije

TUMAČENJE

Odluka Visokog predstavnika o reduciranju sredstava stranaka, ne odnosi se na sredstva za rad Klubova zastupnika.

Predloženo tumačenje je jednoglasno prihvaćeno od svih prisutnih na sjednici Administrativne komisije.

te na osnovu naprijed navedenog donijeti

ODLUKU

I-Nalog kojim se obustavljaju sve isplate sa utvrđenih budžetskih pozicija za stranačko financiranje HDZ-a, ("Sl.glasnik BiH" br.: 12/04) i Odluka kojom se obustavljaju sve isplate sa utvrđenih proračunskih pozicija za stranačko financiranje SDS-u i kojom se izdaje nalog SDS-u za podnošenje finansijskog plana za period od 01. siječnja 2003 do 31. ožujka 2004 godine ("Sl.glasnik BiH" br.: 14/04) koje je donio Visoki predstavnik, ne odnose se na reduciranje sredstava namijenjenih za rad

1. Kluba HDZ-Demokršćani;
2. Kluba Srpske demokratske stranke,

Zastupničkog doma Parlamentarne skupštine Bosne i Hercegovine, pa se istim imaju izvršiti isplate za opravdane troškove vezane za rad Klubova, uključujući i direktne isplate dobavljačima roba i usluga.

II-Za izvršenje ove Odluke, zadužuje se Računovodstvo Tajništva Parlamentarne skupštine Bosne i Hercegovine.

Odluka je jednoglasno prihvaćena od svih prisutnih na sjednici Administrativne komisije.

Što se tiče prostorija, iznjelo je mišljenje, da u vezi sa dodjelom istih, trebaju biti utvrđeni prioriteti. **Broj zastupničkih mandata bi trebao biti kriterij za dodjelu istih.**

U raspravi je ponovo uzeo učešća Hadžović Vedran, koji je naglasio, da po ovom pitanju jedino Mješoviti klub zastupnika za sada nema na raspolaganju niti jednu prostoriju, već mu je na raspolaganje data Biblioteka, s tim da je bibliotekar, u toku rada Kluba, obavezan napustiti prostoriju Biblioteke i time omogućiti neometan rad Kluba. Posebno je naglašeno da, pored činjenice da nema slobodnog prostora koji bi se mogao dati na raspolaganje za rad Klubova, taj **problem je prisutan i kad se radi o radnim prostorijama za službenike** budući da neki sjede u prostoru koji nema prozora. Istakao je, da on trenutno ne vidi način kako bi se obzirom na ovakvo stanje mogao riješiti ovaj problem.

Nakon ovog obrazloženja i sveobuhvatne rasprave po ovoj točki dnevnog reda, Munib Jusufović je naglasio, **da je na sjednici Administrativne komisije konstatovano da, nedostaju dvije prostorije kojim bi se riješilo ovo pitanje.** U skladu sa navedenom konstatacijom, Administrativna komisija je **jednoglasno usvojila**

ZAKLJUČAK

Obavezuje se Kolegij Zastupničkog doma, Parlamentarne skupštine Bosne i Hercegovine, da zajedno sa Ministarskim vijećem, u roku od 7 dana, riješi pitanje nedostatka dvije slobodne prostorije potrebne za rad Mješovitog kluba zastupnika i Kluba HDZ-Demokršćani.

Ukoliko u navedenom roku Kolegij neriješi ovo pitanje, Administrativna komisija će utvrditi kriterije za dodjelu prostora za rad Klubova, na temelju broja mandata i po takvim kriterijima će izvršiti preraspodjelu trenutnog prostora.

AD-4 Administrativna komisija je, po ovoj točki dnevnog reda, jednoglasno donijela

ODLUKU

I-Muberi Ušanović, zastupniku u Zastupničkom domu, odobrava se nadoknada za odvojeni život od obitelji u iznosu od 400,00 KM mjesečno i nadoknada za zakup stana do 500,00 KM mjesečno, kao i pravo na naknadu troškova prijevoza, četiri puta mjesečno, do mjesta prebivališta njene obitelji.

II-Visina nadoknade za zakup stana regulisat će se ugovorom o zakupu.

III-Odluka stupa na snagu danom donošenja, a **primjenjivat će se od 01.06.2004 godine.**

AD-5 U okviru ove točke dnevnog reda, **Administrativna komisija je jednoglasno usvojila**

ZAKLJUČAK

Razmatranje Izvještaja o izvršenju budžeta za period siječanj-svibanj 2004 godine odgađa se za narednu sjednicu Administrativne komisije.

Administrativna komisija smatra, da je po ovom pitanju potrebno sazvati posebnu sjednicu Administrativne komisije, na kojoj bi se razmotrila probijanja troškova i dali konkretni prijedlozi mjera koje treba poduzeti.

U okviru ove točke dnevnog reda, **Vedran Hadžović je predložio Administrativnoj komisiji da donese zaključak**, kojim se upućuje pitanje Vijeću ministara, kada će se početi sa radovima na neboderu.

Zbog neodložnih obaveza pojedinih članova Administrativne komisije prema drugim komisijama koje su također imale zakazane svoje sjednice, rasprava po pitanjima istaknutim u okviru ove točke dnevnog reda odgođena je za narednu sjednicu Administrativne komisije.

Sjednica je završena u 14,30 sati.

Tajnik
Administrativne komisije
Davorka Čaplinski

Predsjedatelj
Administrativne komisije
Munib Jusufović